




## K a n o a n a

<i>Te Kamauri</i>	1
<i>Kaongora mai iroumi</i>	1
<i>Taeka n reirei</i>	4
<i>Ana Tangira Te Uea</i>	5
<i>Te Maiu ae tabu</i>	8

## Te Kamauri



Ana Raoi ma Ana Kimateirei te Atua nakoimi ni kabane tarira ma manera inanon ara botaki ni charismatic i Kiribati ao n tabo nako ake kam mena iai. Te taeka ni butimaai riki nakoimi ni moan kaotinakoan ara nutibeba aio ae 'Emanuera -Te Atua i buakora'.

I kakooua ba Emanuera bon te ara ae kakawaki nakoira ni kabane ngaira katorika i Kiribati ngkai bon aio ngkoa aran te nutibeba n ara botaki ni charismatic iaon Kiribati imuin moan teina n 1982. Are nanona ngkanne ba inanon te ara ae Emanuera, ti a kona iai n nora moan bobouakinan ao kakamakurin te Tamnei ae Raoiroi iaon abara ae Kiribati ninanon Te Tama Joe Hegglin, msc, n reitaki ma tarira ma manera ake a moan unika koran te charismatic renewal iaoni Kiribati.

Imuin te Bentekota ae nako ao ti kakooua korakoran ana wewete te Uea nakoira ba ti na kabouaki ni kabuta te Rongorongoa ae Raoiroi nako tokin aonaba ian korakoran ao ana kairiri te Tamnei ae Raoiroi. Ti na butimaea korakoran te Bentekota ae ngkai-naba ao ti na teirake ma te ang ae boou ni karaoa Nanon te Uea.

Ti kakooua ngkanne ba manga kamaeuan ara nutibeba ae Emanuera bon teuana te kawai ae kakawaki iroua ngaira I-Kiribati.

kain te charismatic renewal n tabo nako aika a kakaokoro, ni kaeka ao ni makuria ana wewete te Uea. Ti na bane n neboa te Atua n Ana bai-tangira ae E a manga anganira ngkai ae Emanu-

era ao bon ara tataro ba ti na kakaonimaki ni karaoa Nanona inanon te nutibeba aio.

Te boto-n-iango are e kan kananoa ma ngkami Emanuera n te tai aio bon banan te Uea inanon te Bentekota ae nako ae kangai, "Natiu, E on-rake Nanou ni kan anganiko katongan Karawa ikai iaon te aba" ao rairana n i-matang ae, "My child, I want you to have a taste of heaven, here on Earth". E na kanga n riki aio? Nna boni kona ni katonga karawa i aonteaba ngkana I kona n nora kororaoin Ana Tangira te Uea ibukiu are E kaotia ni kororaoin ao tamaroan ana Karikibai ao Marakin ma Maten Natina ae lesu iaon te Kai-bangaki. Irarikina ao Nna katonga naba karawa ngkana I neboa man taromauria te Uea ma nanou, tamneiu ao korakorau ni kabane n te aro are I kona ni kaitibo iai ma lesu ae maiu ni kooua ao ni kaonrakeaki Iroua.

Tariu ma maneu, ti bon riai n nanokawaki ao n tabeaianga irouia ake a tuai mani kona ni katonga karawa ibukina ba a bon reimauroa ibukon baikorakin te maiu aio, ke tao a bon rawa ni kan katonga karawa i aonteaba. N aiarioa aomata aika tabu ti bia bane n nora tabera ni kairia tarira ma manera nakon te bai-n-tangira ae kakawaki ae katongan karawa ikai i aonteaba.

Kam raba ni kabane n ami tataro ao ami kaunganao ake a tia ni buoka otinakon Emanuera n te bong ae te Kanimabong, 19 Tun, 2009 are bon Ana Toa Atiniban lesu ae Moan te Tabu, ao moan kaukan te Ririki ibukia ara Berebitero iroun te Ekaritia n aron ana babaire Bobe Benetito XVI. Ke karaoiroaki warekan Emanuera iroumi tarira ma manera ni kabane.



*"Ti a uaia n reitaki ma ngkami n ongo ana kakao Te Uea nakoira ba ti na katonga Karawa ikai iaon te aba"*

Kiribati Catholic Charismatic Renewal Service

Ibukin am rongorongoa, taiaaaka reitaki ma Uriam Timiti, Beneteta Raobati ao Kautoa Tonganibeia.

Phone: + 679 3385364  
 Fax: 555-555-5555  
 E-mail: timiti\_u@usp.ac.fj;  
 bene\_raobati@yahoo.com.au  
 kautoat@yahoo.com

## Kaongora mai Iroumi

Te Bentekota ao te Kainaomata i New Zealand  
 Fulitua Taraoara

I bon rangi n uringnga ba n te bong teuana n te wiki ae nako ao e roko uringam irou (Uriam) ao I a nebonebo naba n ianena inanon te umantabu ngke I tataro. E rangi ni kamimi Ana makuri te Tamnei ae Raoiroi are ti a bon aki kona n rotia!! Ngaia tao ibukin ae iai am rongorongoa aio ae a tiba reke irou n te tai aio.

N ara kainaomata ikai ao bon iai te maroa teutana irou ba are ai bon ti ngai ni karaoia bwa e a rangi n aoraki te Tama Koru ao e a manga kitanira ba e na kataia ni kamarurunga nakon ana tutia ma ngaira are e na kairia n tairikin te Tabati anne n te aoa 6 pm. E bon rawawata nanou ba I atiaa ba ai bon ti ngai ibuakioia ara riita ni kakairi n te tai aio, ba are akea Nei Turia ba e a nako Engiran ao Tuana e a nako Tepuke ao a katukai ma tariu ao maneu aika a bon tiba waaki ao n tia ni bane aia kooti n te Maiu ae On-raken te Maiu ake a rangi n ingainganga nakon kainaomatakia.



A bon nanokawaki ngkai a ataia ae nang aki raonia te Tama Koru ao a tuangai bwa a bon tangira te kainaomataki n te tai anne ba are bon ana Toa te Tamnei ae Raoiroi. Ai bon akea au anga ma I a bubutia te Tamnei ae Raoiroi ba E na kabonganai n Ana mwakuri. I rangi ni karaba te Uea ba E bon rangi ni korakora angin namakinan Ana Karea te Tamnei ae Raoiroi ake E a karuoa nako aora n te tai arei. Ai bon te tang naba iroura ni bane mai i moana ni karokoa tokina.



Bon onoman raora ake a kainaomataki. Ai bon kamimira ba ai bon tiba au tai n kaira te waki arei ma n aron are I taku, I karaba te Atua ba E kabonganai, e ngae ngke I bon aki tau, ba Nna kairiia tariu nakon te kainaomataki. Ara waki are ti wakinna ti tebo ma e a bon karekareaki

naba au iango n te bai ae Nna karaoia...teuana imuin teuana!!!... ti bon nebonebo ao ni wareka Ana Taeka te Uea are e rangi ni katekenano ba man te Euangkerio are "Ti na tangira te Atua iaoni baai ni kabane". Ti aki anga ara bubuti ba ti a wakina naba te kainaomata ni weteia nako nuka taan kainaomataki ao ti a kamronron i akuia ngaira ake ti aki kooti. Ti moana ara waki ma te anene ae 'Kaniko Tamneiu ma te Baonikarea'...ao ni bubutia Atiniban Iesu bwa E na kauka nakaira kaubain ao koburaken te kabaia man Atinibanna. Imina ao ti a kanakoa ara bubuti ibukia tan kaimaomataki ao are a bon manga reitia imuina ni kanakoi oin aia bubuti.

I bon moanna ma au tatarao nakon te Atua ba E na tebokira ni bane, ni kaitiakira ao ni katabuira, ao ni kawakinira ngaira ake ti na waki n Raran Atinibanin Natina. Imuina ao ti a taekina aia tataro ni kainaomata Tamneia. Ti a taona muina

n anene n takarua te anene are 'Kainaomataa Tamneiu Iesu..., Bwa Nna neboa Aram ae Tabu...' E toki anne ao tia a wetea naba te Tamnei ae Raoiroi ma Ana Karea nako ...'Tamneiu te Tangira te Tamnei ae e Raoiroi....'ao e a nako naba kain te Nebonebo.

I a kaman tuangia raora ake a na kainaomataki ba ngkana ti tataro n ianena iaioia ni wetea Ana Kainaomata ao Ana karea te Tamnei ae Raoiroi ao a na tataro ni katoka bai iaon te Tama Koru are e aoraki ao e aki raonira, ao iaioia naba aomata ake a ataia ba a aoraki ao a kainnanao buokaia, ao ai ibukin itera riki ake a roko n aia iango ba a riai n tataro ibukina ke ibukia n te tai arei.



N te tai anne are ti a bon namakina te ang ae e kakoro ao ti kimareirei ma ni kakatituaraoa iai te Atua. Ti kainiira n ara anene nakon Nei Maria are 'Ti katanira iroum te Tina ae e Raoiroi, Mai kawakinira..'Bon au kakaitau ae bati nakon Iesu ngkai E


teimatoa n tangirai ba Nna 'uaia ni makuri ma Ngaia' ao ngkai E a rineai ba I tau ni karaoa Nanona n Ana Karatia. Au kakatituaraoi riki nakoina ibukia tarira ao manera ake a tia ni katonga kimareirein ana Tangira ao n riki ba taan iriira Iesu ni koaua ni uouota ana Tangira nakoia aomata.

Tao ti anne rongorongon ara waki n te tai ni kainaomata. Ko bati n raba n am tataro ao ti kukurei n ataia ba ti reitaki n tainako n ana Tangira Iesu ao iroun te Tamnei ae Raoiroi are E kairiri ara iango ma ara waki...ao riki ngkai ti ataia bwa e raonira Nei Maria n tainako n ara tai n nebonebo ma n tataro ao ni karaoi tabera aika kakaokoro inanon maiura. E rabwa te Atua. Tao ti ngaia moa anne ara kaongora mai New Zealand. Ara Tataro ma ara

*'E rangi ni kamimi  
Ana makuri te Tamnei  
ae Raoiroi are ti a bon  
aki kona n rotia!!'*

**Kangora mai Suva, Biti**

*Beneteta Raobati*



Kam na mauri ni kabane n Ana Tangira te Uea ao Ana Tangira te Uea iaora raora n taai nako.

Onikan nanoia tarira ma mwanera ngaia bon ara kaongora nakoimi ao boni ngai temanna mai buakoia are I bon kan bunra Ana Tangira te Uea nakoimi.

Onoman riki aika a na manga reitia Raora tabeman a na manga kaongora n are imuina.

An tauraoi ngkai n ongora. Moan tein ara botaki ni Charismatic bon man te ririki 2006 n te toa ae Benetekota ma maitina kaina ae itiman. Ikai ao are e a waaki ara bootaki n ririkrake ni

mwaiti kaaina. Ti kunea te tangira ae bati inanon ara botaki. Iai Ana Tangira Te Uea ae e maeu inanora n taainako. Irarikina ao imuin Bentekota n te ririki aio e a reke aran ara botaki aei bwa **Saint Padre Pio Charismatic Renewal Group.**

St. Padre Pio e iraorao ma Atinbwanin Iesu; e mmaraki Ibukina. E katotonga marakin Iesu i baina ake uoua. St Padre Pio bon te Tama man te kaawa ae Pietrelcina n te aba ae Itare. Inanon maeun teuaei ao e bati ana tai ni buaka ma te Riaboroo.

E mamaakua te Riaboro bwa e kakauna Santo Mikaere te Akaanera nakoina. Aara aika teniua: St. Padre Pio, Atinbwan Iesu ao Santo Mikaere bon aara ake a otinako n tain te kario ara ao man rinerine ibukin aran ara bootaki. E



tebenako St Padre Pio bwa a nooraki aara ake uoua inanona. E raba te Uea, e a reke aran ara bootaki aei ba **Saint Padre Pio Charismatic Renewal Group.**



*Kainaomatakia kain St Padre Pio tabeman n tain te Benetekota i Wailoku.*



**Ana kaongora SMCRSC**

*Tebuui Uaai*

SMCRSC ke te “Santa Maria Charismatic Renewal Steering Committee” man te Parish ae Sto. Ioteba, Bikenibeu ao te kantaninga are e aanaki iai te SMCRSC ba ibukin karokoan te Rongorongoe ae Kakukurei irom ngkoe te tia wareware bwa ko aonga n atai bwa tera baika a riki ke tera taiani waki aika e na wakini te Botaki ae te SMCR inanon te Parish ae Sto. Iotebwa inanon te ririki aei. Bon te bubuti bwa e na kakaraoiroaki te SMCRSC ao man anganaki te teimatoa ni waki ngkai ao nakon taai aika imwaira.




Ni kaineti ma ana babaire te NSC, ke te “National Service Committee” are ana Rabata n Tararua te Kiribati National Charismatic Renewal (KNCR) ao e moanaki te Toa aio ma te “Seminar” n te man ae teuana te wiiki. E korakora te buoka ma te ota are e reke man te “Seminar” ao ti kukurei n arora ara kakaitau nakon te Tama Ruatamaki ma te Tama Patrick, Akorita Tebanako ma Taratake ao ai kaain te Tiike nam ibukin Katanan ara Onimaki ni Katorika ibukin aia reirei are a karaoia n tain te “Seminar”. Ti karabana naba ana Tiim te Tama Michael are a karoa nakoira te maroro iaon taiani kanganga aika a kona n riki n te mwenga teuana ma teuana.

A bon reke naba rokoia tarira ma manera mani Parishes aika Tarawa leta, Aranuka, Abemama, Tabiteuea Meang ao ai Tabiteuea Maiaki. N te Toa ae te Bentekota are e booaki n te Parish ae Teoraereke n 31/05/09 ao a kaboouaki kaain ana Taibora te Charismatic Renewal ni Parishes aika Betio, Teoraereke ao ai Bikenibeu. A bon

rineaki naba tarira ma manera ake a na kaaina ana Rabata n Tararua te Kiribati National Charismatic Renewal (KNCR) ae te NSC, ke te National Service Committee.

N te rinerine are a karaoia kaain te Santa Maria Charismatic Renewal (SMCR) n te Parish ae Sto. Ioteba ibukin kaain ana Taibora n Tararua te SMCR ao a rineaki tarira ma manera aikai:- Nei Neiti Kairaoi ba te Tiibi Riita, Nei Kantarawa ba te Ka2 n Tiibi Riita, Moarite ba te tia koroboki, ao ai Titau loane ba te tia mwane. N te tai naba anne ao e rineakiia tarira ma manera ae Ten Taokai ba e na kaaina riki ana Rabata n Tararua te KNCR ae te NSC. ao raona are e reke n te tai aei bon te Tiibi Riita ngkoa n te SMCR ae Nei Beia. N te Parish ae Teoraereke ao e rineaki tarira ma manera ae Tiaon Tirae ba te Tiibi Riita, ana Ka2 bon Nei Meeta Eriuta, te Koroboki bon Nei Bite Marontau ao te tia mane bon Nei Mangarita Miakaere. Tarira ma manera ake a rineaki ba a na kaaina te NSC man te Parish aei bon Kaoti Teingoa ao Raimon Tabane.



Man te Parish ae Betio ao a rineaki tarira ma manera aika Nei Makurita ma Nei Tiiria Riwata ba kaain te NSC. E tuai n ataki n te tai aio te Tiibi Riita ma kaain ana taibora te Parish aei. E oti man te rinerine mai Betio, Teoraereke ao Bikenibeu ba kanga e tuai n toki nanon te Uea ni kani kabea-beaniia tarira ma manera aika a tia n rineaki. Bon ara bubuti nakon te Uea ba a na kaonrakeaki tarira ma manera aikai n ana Karea te Tamnei ae Raoiroi n te aro ba aonga n riki ngaiia ba kawain Ana Tangira nakoira. Ti onimakina ana ibuobuoki Tinara ae Nei Maria ae moan te Tabu ba e na kawakiniia ao mani katabuiia tarira ma manera aika a tia n anganaki te muiokoaki ba a na riki ba tan onea mwiin Iesu ni kawakiinia ana

*“Bon ara bubuti nakon te Uea bwa a na kaonrakeaki tarira ma mwanera aikai n ana Karea te Tamnei ae Raoiroi.....”*





## Taeka n Reirei

**Te Maiu ni Kiritian, ao te Tamnei ae Raoiroi**  
(E anaaki man te 'Maiu ae Onraken te Maiu)

Ngkana ti taekinaki te taeka ae "Te Maiu ni Kiritian" ao e a ti reke naba aia iango angia aomata ba "Te Maiu ni kekeiaki", ke te maiu ae kanganga man rawawata.

Tao ti bebete riki ngke arona ba e aki roko Iesu? Bon tiaki! Te "Euangkerio" bon te "Rongorongoa ae Raoiroi" ae e kakukurei. Ae nanona, ba bon te bai ae e kakukurei te Maiu ni Kiritian, e ngae ngke ti na boni bo naba n ai aroia aomata nako n taiani kanganga ma rawawata. Ma oin rokon Iesu ba E na kamauira ma ni kabebeteira ao tiaki ba E na karawawata maiura.



E kanganga irakin Iesu irouia Kiritian aika moan te bati ibukina ba kanga a maninga te Tamnei ae Raoiroi, ae Ngaia te ang ao te korakora ae E anganira Iesu. E koaua ba e kanganga kekeiakinan te Maiu ni Kiritian n akea

Ngaia, ba e uarereke uan ara kekeiaki.

A bane Kiritian n anganaki te Tamnei ae Raoiroi n te Takamentu ae te Babetito. Ma ngkana e tangiria te Kiritian ba e na kairaki ni bai ni kabane ni maiuna iroun te Tamnei, ao ngkana e tauraoi n angan te Tamnei te inaomata iaoni ba ni kabane, ao ngkana e butia Iesu ba E na kamaiua i nanon makan te Tamnei ae Raoiroi, ao ngkanne e nang tiba noraki te okoro ma are mai maina, ao e riki ba te bai ae moan te kamaiu. "Te Maiu ni Kiritian".

Ena oti man noraki makan te Tamnei ni maiun te Kiritian n itera aikai:

- Te ungannano ni kan tataro (ao riki ni kan neneboa te Uea)
- Te kan iraorao ma tarina ma manena n te Aro
- Te rau riki ni mwengana
- Te kona n tokanikai i aoni mamarana ke ana bure aika tao e aki kona mai maina
- Namakinan te Uea ae Iesu ba E maiu ao E kaan ma ngaia
- Norakin ana karea te Tamnei ae raoiroi

E na bon bae n iai te kekeiaki n ibuobuoki ma Iesu ngkana ti a tia ni manga kunea n te aro ae boou. Ma te bai ae bon te moani bai ni baai ni kabane boni butimaeni ma kakoauan te Rongorongoa ae Raoiroi! E tangiriko te Atua! Ao E tangiria ba ko na ataia n te aro ae bou ba E rangi ni kaan riki ma ngkoe nakon are ko taku. E tangiria naba ba ko na namakina riki makana ni maium! A maiti ana kawai te Uea n ibuobuoki ma ana aomata i bukin karekean baikanne. Ma te kawai ae ti na reirei ma n toua bon kawain "Te

Charismatic".

Uabui tabun te mirion Katorika aika a tiba manga kunea te onimaki ae maiu ao te tangira ae bou n ririki aika a nako n te waaki aei.

### Karakinan Te Charismatic Renewal

Karakinan te "Charismatic Renewal" (Kabouan te Ekaretia ni kawain ana karea te Tamnei ae Raoiroi). E bon aki kateaki te Charismatic n ai aroia botaki aika a kateaki iroun te aomata temanna ke temanna. Kanga tiaki te botaki ni koaua n ai aroia botaki nako ma e eti riki ngkana ti kangai; ba kanga te karanga ni karatia teuana ae E angan te Ekaretia te Uea n tai aikai. E moan butimaeaki n Aro ni Kamatu aika a uarereke tabeua (Pentecostals) in moan te bubua n ririki aei. Tao nimabui te ririki i muina, ao e a roko irouia Aro ni Kamatu aika a bubura n ai aron te Baptist, te Lutheran ao a maiti riki. Te Ekaretia Katorika bon te kabanea n Aro are e roko iai te waki ae te Charismatic, ma e rangin ni butimaka riki wakina iai nakon Aro ni kamatu.

Moan te boou te waki aei n te Ekaretia Katorika ba e a tiba roko iai n 1966. Bon taan reirei ao ataein te reirei n te kura ae rietata (University) i Amerika (Pittsburg) ake a moan ongo taekan "Kainaomatan te Tamnei ae Raoiroi" ae e kona n reke n te onimaki ao te bubuti nakon te Uea. Bukin te waki aei, ke botona ba e na kainaomataki ni maiun te aomata, ao ni maiun naba te Ekaretia ana karea te Tamnei ae Raoiroi n aron are e kababarara St. Bauro i nanon ana moan reta nakoia I-Korinto (Makoro 12 & 14).

A bo ngkanne ma kain te botaki n tataro teuana ao a butia ba a na buoka aia bubuti ibukin "Kainaomatan te Tamnei ae Raoiroi" are irouia. Ngke a tia ni karaoa aei ao a namakina te bitaki ae bati i nanoni maiuia ao n aia bobotaki. E ririkirake i nanaoia maiuakinan te tataro n neboneboa te Uea ma ni katituaraoia. E taetae te Uea nakoia n te katei ae e aranaki ba te taetae ni burabeti, ae ana rongorongoa te Uea ae katinakoa temanna n oin ana taeka. A tataro naba ma aoraki aika a maiti ibukin te katoki aoraki, ao a maiti aika a tia ni kamaiuaki i muin aia tataro. A taku ba e a boni ngae ngke kain te Aro ni Katorika ngaia ma ngkoa, ao a bon tiba namakina maiun aia onimaki ae e a reke ngkai n te waki aei.

E tabe n ataki teutana i muin teutana te waki aei, ae ana waki te Tamnei ae Raoiroi i nanon te Ekaretia Katorika. Tao iraua ngkai te mirion ni bong aikai maitia Katorika aika a tia ni butimaei ana karea te Tamnei ae Raoiroi i muin are e a tia n tataro te aba i bukia, ba E bia noraki ni maiuia, makan te Tamnei ae Raoiroi. Iai kaina aika Karetinare ma Ebikobo, ao e a kani buta i aonaba. E moani karaoaki te botaki ae bubura I Roma n te ririki te 1975. A roko iai 10,000 kaina, ao a butimaeaki iroun te Bobe ae Bauro VI n ana Uman-tabu ae St Betero ni bongin te Benetekota. Bon te Bobe ae E kaira te Tutia, ao e kaotia n ana kaoti-oti, ba te bai ae moan te raoiroi ibukin te Ekaretia te Charismatic Renewal ("a chance for the Church").

*"E kanganga irakin Iesu  
ironia Kiritian aika moan  
te bati ibukina ba kanga a  
maninga taekan te Tamnei  
ae Raoiroi"*

## Ana Tangira Te Uea

### E Wewetea Arau Iesu

Ian Namakin, St Padre Pio Charismatic Group.

Mauri Tariu ma Maneu n Ana Tangira te Uea !!!!!  
Te moantaeka ae I kan taekinna bon te karabaraba nakoia tariu ma maneu ake a tia ni karekea iangoan kamaeuan Emmuera Newsletter n te ririki aio ba e na manga karaka riki te kamaiu nakoira ngaira ana botanaomata te Uea aika ti a tiba namakina ana tangira te Uea, ao riki ai manga te kabouaki nakoia tarira ma manera ake a tia ni bua inanon te tai ae maan inanon kaibabarun ao reimauruan te maiu aio. I karabaia naba tariu ma maneu n aia tibataba are e reke taina n te tai aio n tibwaki inanon ara nutibeba aio ba reitakin ana tangira te Uea ni manga kamarurungira ao ni kakorakoraira.

I moan ongo te wewete aio iroun Iesu n te 11th April 2008, are I moan kaina iai te botaki ni charismatic iaon Suva, are nanona ba ai teuana tabun te ririki maaniu ma au utu ni kekeiaki ni irira Iesu inanon te kanganga ao te kukurei. E rangi ni bati ana tangira te Uea nakoia ae I a tia n namakinna ma teuana mai buakon ana tangira ae I rangin kan tibaia ma ngkami bon aron katauraokiu imain wetean natiu Irouna. Iai natiu te m'ane ae au karimoa are e reke irouna te aoraki ae te buuro are bon rikina man moan bungiakina. Aran natiu aio bon Barry ao e a bon ikawai inanon te rin n te onaoraki man uarerekena ni karokoa 9 ana ririki. E a rangi ni bati naba aia koaua taokita ake a tia n aki koro nanoia iroun natiu aio ni korakoran te tataro ae bati ibukina. E a rangi ni bati au ririki n aki kukurei iroun te Atua ngkai E a bon anganai natiu ae e aoraki burona, ma te kamimi ba n te ririki ae nako ao e bon tiba kaurea matau te Uea ngke I rairaki Nakoina; ba Ngaia bon ana bain-tangira nakoia aio ae e rangi ni boiarara.

Inanon Turai n te ririki ae nako, ao e a manga baka naba n aoraki Barry n te aro ae kanga e bon titiraki iai nanou nakon te Uea ba e na kamarurunga natiu aio, ma te kamimi teuana ba maitin au tataro nakoina ao baitin rawawatan riki natiu n te maraki are e weweneakinna. Aio naba te moan tai are I kata iai te katoki aoraki ae te katoka bai are I ongongo naba ae kakaraoaki n te botaki n tataro ni charismatic aio ngaia are I a kataia ni karaoia ma inanon waakira ni katoka bai ao e a rangi ni bati te kamimi ae e a kaoti raoi man te tai anne. Inanon ara tai n tataro iaona ao titebo ma e wiriwiriki te Uea ni tuangai ana rongorongoa aika a bati ibukin anganakiu natiu ae te aekaki aio. Teuana mai iai boni kamatatakiu ba Nna uringa ana reke ni bong natiu aio are e bakara raoi te "New Millennium" are 1 Tianuare,



2000, are e rebwe taua iai te aonaba ae banin n te kukurei". Ngke I ongo anne ao e bon rangi ni korakora iroun te tang ao te uringaba. E aki toki ana wiririki te Uea ma e a manga tuangai riki are "te tei ane imatam anne, aron karaoan rabatana Iroun e rangi ni kanganga riki nakon karaoakin rabatam Irouna ao e rangi ni bobuaka riki karaona nakon te bai ae ko rangi ni mataiakinna inanon maium". E a kakorakora riki te tang iroun ba I a tiba kunea ae bon te tia bure ngai n aro nakon te Uea n riribaia, e ngae ngke Ngaia E a bon tia ni karaka aro mai buakoia karo aika a bati, n anganakiu natiu ae rangi ni kaokoro. Man te tai anne ao e a riibu naba au onimaki irouna ao I a kaburea naba maeun natiu Nakoina. Inanon te tai ae e aki rangi ni maan ao ti a rin n te onaoraki ba e a bon roko ni korakorana aorakin natiu are ti aki kona n taua riki iai n te auti kiolina ngkai e a rangi ni mamara. I uringa naba te tai anne ba e rangi ni korakora te tataro mai irouia kain ara botaki n tataro ao titebo ma e bon anganira naba te Uea te kakorakoraki n te maraki are ti a uouotia inanon te tai anne. Ni mamaran natiu anne ao iai au bubuti iai nakon te Tamnei ae Raoiroi ba E na reireinai te nebonebo ni ianena ao I karaba ba E bon anganai naba n te tai are I tuanga iai, ba e a bon tebenako naba iroun te karangaina teuana inanon wenen natiu ma te maraki n atu ae korakora ao ngke e a nako au taetae ni ianena ao e a marau nako naba te maraki arei iroun Barry ao e a rau naba ni matu. I taku ba e rangi ni bati ana kamimi te Uea nakon natiu aio ma I a bon tiba kunea raoi naba ae bon ana kamimi raoi te Uea nakoia.

Inanon Tebetemba n te ririki naba anne ao e a bon roroko n tokina marurungin natiu aio ao e weteai te taokita ni karaua nanou ba Nna tuanga natiu ba ngkana e matu ao ngkana e uti ni matu ao e nang nora Iesu i karawa... Tera am iango ngkoe ngkana e tuangko te taokita te aeka n rongorongoa aio? Ngai e wawanako ranin matau ao e rotai te tang ao I bubutia te Uea naba n te miniti arei ba E na kakorakorai. E bane ana maroro te taokita ni karau nano nakoia ao ngai I manga kaeka nakoina ni kangai, "I taku ba e nang bon riai n anaaki natiu iroun Iesu ba e a tia tabena are e roko ibukina ba I a KIINA IESU". E aki manga taetae riki te taokita ma e a wawanako ranin matana ngke I tabeka au taeka akanne nakoina.



E motirawa natiu ni karangainan te Moanibong, 29 Tebetemba, 2009, are e kinaki te tai anne n ara karentare ni Katorika ba

aia toa Aka-Anera ake teniman ake St Mikaere, St Rabaere, ao St Kabiriera. E bon kaotia iai nakoia te Uea ba e rangi ni kakawaki tetei anne



*"I teimatoa n  
onimakina te Uea ni  
karokoa te bong aio  
....."*



Irouna ba boni ngaia ana tia ua rongorongo nakon te aonaba aio are E tia n onikia nakon te iriko ma te rara, ba e na kaiokai ma Ngaia inanon au tangira nakon natiu aio.

I teimatoa n onimakina te Uea ni karokoa te bong aio ba Ngaia bon iai bukin baai ni kabane ake E anganira n tatabemanira nako ao riki iroun natiu are E anganai ae e kabi n taetae ao ni bonotanginga ao e bon roko naba ana rongorongo irou ae kangai **“E Rangī ni Uarereke te Maiu Aio ao E Raoiroi te Kakatauraoi”**. E raba te Uea n ana tangira.

**Moan reken te Maiu n Onimaki.**

*Boboro Atanteora, St Padre Pio Charismatic Group*

Kam na bane ni mauri tariu ao maneu n ana tangira lesu.

E ura kawaim inanon maium man te tai ao te bong are ko moan toua iai te m’aneka ni katei utu?

Eng I bon aki nanoua ba ko a bon tia n rinanon te un, te tang, te ribaaki, te maraki, te winnantiaki, te matanokuaki, te kanaeng, te raure ao n tokina te kani bakabureiko ba ko a bon aki konai moan namakin aikai.

Ko a tia ni karekea am tai n tekateka ao man iangoia ba a kanga n riki ao a nako maia namakin aikai, ao e aera ngkai a reke iroum?

N au namakin ngai ao kanganga aikai a bon riki man nanou ni babakantang ao ni kairiribai. Bon ngai naba temanna are I a tia n rinanona ao I a tia ni inimaki ao ni iakiaki ma namakin aikai inanon maiu ao riki inanon au tai ni katei utu. E bon tare au iango ni kakaea tokina ao I a taku ngai ba Nna bon mate inanon ao e na bon aki reke irou te maiu are e tabe ni uaiakinaki ae te maeka i karawa ni mimitongin te Atua.

I bon rangi ni karaba ao n neboneboa te Atua ao natina ae lesu ngkai E a tia ni kairai nakon te botaki ae te Charismatic ae St Padre Pio. Inanon irirakin te botaki n tataro aio ao e tabe n ririkirake irou kinakin raoi lesu ma Tinana ae Nei Maria te Imakurata. E rikirake naba iai au namakin ao kinakin ana makuri te Atua te Tamnei ae Raoiroi rinanoia aomata ake I rereitaki ma ngaia ao riki i bon inanon au utu ake a tia n riki ba rawawatan au kaibangaki inanon maiu.

Aio ngkanne teuana mai buakon ana makuri te Tamnei ae Raoiroi are e karekea te tokanikai irou iaon rawawatau n au kanganga inanon maiu bon imain ana Toa Te Tamnei ae Raoiroi (Bentekota) ao e a kauringaki iai ana toa utu ni mitinare ae Nei Maria ara Uea mai iroun Atinibanin lesu. (Our Lady of the Sacred Heart). N te tai aio ao e tibatabaaki tamnein Nei Maria te



Imakurata ae e tei n taua ke n toba lesu te Tei ni baina are te angamaing ao baina are te angatai e kotea buroon natina. lesu te Tei E taua buroona ni baina are te angamaing ao E kotea tinana ni baina are te angatai. E kaotaki ikai ba lesu E bon rangi n tatangira tinana ao tinana e bon rangi ni mamate naba nanona Irouna.

Inanon matakukianan te tamnei aio ao n ongoraau n te kabarabara iaona ao I a nora tamneiu n au iango ngke I tabe ni iakiaki n tang ma baiu aika a koonaa babaau ba I namakina ba iai te maraki ao te bue are e biri inanon burou ngke I a noora natiu ba e aki ikeike imuin bainaorakiana irouia taokita I ataia ae e a mate ao ai bon tiba ngaia inanon au utu ae moani mate ke n anaaki mai irou. I aki ataia ae I koonaa babaau n tang ma I a tiba ataia ngke e a tabe ni katitikai temanna ai tariu (Koin) ni kaotinakoai mai iaan te sink ae e uaraoi, are I tabe n tang man iakiaki iaana.



E bon waaki nako te kabarabara ao ngai e a bon wawanako ranin matau ba I ataia ae I a namakina aron marakin Nei Maria ngke e tiringaki natina iaon te kaibangaki. I karaba te Tamnei ae Raoiroi ngkai I a kona n namakina marakin Nei Maria ao natina ae lesu Kristo ngke E tauraki man tiringaki iaon te kaibangaki ibukin au bure. I bon namakinna naba ao ni kakooua ae bon ngai naba are I a tia ni motika Taekana ba E na bobitiki Baina ma Waena; E na baunaki Atuuna nte kai ae kateketeke ao e na ewaraki Rarikina n te kairereba ibukin nanou ni babakantang ao ni kairiribai.

N te bong ae te Tabati ae te Bentekota ao inanon tain te kainaomataki ao I a motika nanou ma tamneiu ba N nang kakea mairou te nano ae te babakantang ao te kairiribai. I bon bubutia naba te Tamnei ae Raoiroi ba E na raonai n au motinano aio I karaba te Tamnei ae Raoiroi ba I a tokanikai ao e a reke irou te Kooraa (te onimaki ae namakinan te maraki are e rinanona Nei Maria ma natina) are e raanga mai iai ngkai ana Raoi ma ana Kakukurei ae akea kabotauana inanon maiu ni katei utu.

Ngkoe are e a tia n anaaki maiun (mate) temanna ae ko rangi n tangiria inanon maium aio ao riki ae oin natim are ko maraki ngke ko bungia, akea au nano kokoraki iai ba boni ngkoe naba temanna are kona namakina iai marakin lesu ma tinana. Ti na taubai ngai ma ngkoe ni kabongana namakinan te maraki ibukin te tangira, ba ara bai ni buakana teuare e buakaka ae ngaia ae e kaakariki nano aikai inanora.

Kam bati n raba n ana Tangira Te Uea.

Tarimi ao manemi inanon Te Uea,

*“I a namakina aron marakin Nei Maria ngke e tiringaki natina iaon te kaibangaki”*

### Kamaeuara bon Mauiakinan te Tangira

Jenny K Tonganibeia, St Padre Pio Charismatic Group.

Kam na bane moa ni mauri tariu ma maneu inanon ana tangira Te Uea.

Ai bon au taeka aei ni kaunganano nakoimi ake a reke aia tai ni wareka au tibatika aeo, ba kam na bon aki babaina te barannano man onimakinan Te Atua ae Tamara ae moan te maaka inanon maiumi. E ngae ngke iraua ma iraua ami ririki n rinanon te kanganga ma bon tai kaakabua naba taekan Te Atua iroumi, ngkai boni Ngaia te tia tautaeakana maeura n taai nako.

Eng, te kibunikoora ae I kan tibiaia ma ngkai nte tai aei, "Am Onimaki bon Kamaeuam nakon te tai are e na roko, e aki kona ni kamaeuko temanna ma temanna n ana Onimaki". I bon kan tibia aoi nakoimi ba ngaia ae I taku ba e bon kamaeuai au onimaki ao tiaki kainabau ke raraou ae kairai nakon te maiu ae boou aei.

Nna moanna moa man moan kainakin te Ekaretia ae te Katorika irou. Ngai bon te Kamatuu au aro ma I riki ni kaina te Katorika ba I iraanako kainabau ae Kautoa nakon ana aaro ngke ti mare. Bon au koaua are e titiku inanon ba akea okoron aara aro ngai ma kainabau, e aoria ngke e kaokoro aron neboan Atuara iroua ma bon tokira ni kabane bon taromaurian tii temanna Te Atua ae ngaia ae ti toro irouna n taai nako inanon maiura ni kiritian.

E koaua ba are tao angkoa I a iranako buu nakon ana aaro ma I a kamatoa ngkai ni kaina te Ekaretia ae te Katorika i bukina?? Bon tiaki anne bukina ba I irianako ibukin ana aro ma te bai ae e nang kakawaki ba e na matata ba e bon baka nanou n ana kakaonimaki buu n tataro ni katoa Tabati e ngae ngke iai te mamara inanon maeura ma e bon aki naba kona ni baka ana Tutia ma ngai bon maiu raori are I aki tatabe ngkana e baka au Tabati.

Ma ngke ti a kariki, ao e a korakora riki au kakaonimaki n tataromauri ke n tutia iaan au koaua are a aonga n nooraki tamneira ke bannara irouia natira ae kaaro ngaira aika ti nang kakaonimaki n tutia. I nang tangiria natira ba a na kawkawirakeaki inanon te kaakaonimaki n tataro ao ni maiuna te maeu ni kiritian, e ngae ngkana a rinanon kanganga ma mamara inanon rikirakeia ao a na bon riai naba n namakina kakawakin te tataro.

Te kauoua, bon moan kainakin te botaki ae te Charismatic irou, e bon reke man kan irarikin kainabau ngke e kaeka kaoakina irouia tarina aika lan ma Aata nakon aia botaki n tataro n te taina. I bon kakaomataai nte moantai are I kairaki iai ma e manga kamanangai banaan nanou ba e riai te kaninganinga ba I iaonga n nora aron aia tataro kain te botaki ae te Charismatic. Te moani bong are I ira iai te botaki aei ao e a bon ringaki naba



nanou n aron te bonnano n tataro ma aron nebonebo aika I nang iroua iai ao aron tibatika mai irouia kain te bootaki. Namakinan ana makuri te Tamnei ae Raioiroi irou nte tai anne e nang korakora nte aro are e a bon kakairinakoai naba nakon

karakaakin riki aron neboan ara Uea irou n ua taai aikai.

Te bai ae I nang babaka iai nanou nte botaki n tataro aei bon namakinan te kabebeteno ae bati man rau au iango inanon maiu ae boou aei, man tibatika ake a rereke mai i muin te makoro n nebonebo. E namakinna burou ma tamneiu ba e kakarakaaki naba kamaiau man tibatika ake a rereke mai irouia tariu ma maneu n ara botaki n tataro aio. Ao anne bon bukin te ingainga n nano ae korakora namakinana man moan irakin te botaki n tataro aio n ua taai aikai.

Bon i nanon uoua te bong imain te tai are ti na kainaomataaki iai n tain te Bentekota, ao ai bon au tataeka naba ae e okioki nakon kain abau ba ti nang kabaia ngkai e reke iroua te maiu ae boou aei ba ti nang nanamakina iai rakan te kakukurei n ara utu are ti bon aki nonoria ngkoa n taai akekei. Ao nte bong are ti a kainaomataaki iai, ao bon iai te bai ae e nang korakora man raka namakinana n ua ngkai irou, ba bon kakarimoakin te tangira irou ae bati n au makuri ni kabane nte reirei ao ni bon inanon mwengau ao n tabo ake I



mena iai, tao kioina ngke bon anuan maeu ngkoa te kamoamo ma te banga-aomata n taai tabetai (kakaomataai), man korakora

naba irou te kakaiririba. E nang raba te Uea ba E kona n anganai tibangau ke au karea ae boou ae te TANGIRA ba Nna keiakina ni kateimatoa inanon maiu n ua mateu. Te tibanga ae I kunea aio bon mai muin ara kooti ae I bon aki kona ni maninga nuua mateu te taeka ae kangai, "ba ane e ngae ni kakaraoa ae raioiroi ma ni buobuokia kainano ma ni bakaburea rabatana ibukin kamaiuaia aomata ma akea irouna te TANGIRA ni koaua; bon akea uaan maiuna". Ikai are ti a manga kaokaki naba nakon kawakinan ana tua ake tebuina ake a kona ni botaki i nanon ti teuana ba te tuan te TANGIRA, tangiran te Atua ao tangiran raom n aiaron tangiram i bon iroum". Aio ana kibu n taeka Atuara are e a tuanga ba N nang raira nanou mai iai man kaaki nano aika bubuaka ma nano ni kakaboa muin te buakaka are I taku ba e nang matoatoa kaakakina irou. Ma e kamata-taki ikai ba ngkana ti tangiria ara kaiririba ao ti na kamaiuaki.

Tokin te rongorong, ao I kunea ba tibangau ma ngkoe ti na onimakina te Atua ibukin bairean maeura n taai nako ao ni karaoan anne ao ti riai ni



*ba ane e ngae ni  
kakaraoa ae raioiroi ma  
ni buobuokia kainano  
ma ni bakaburea  
rabatana ibukin  
kamaiuaia aomata ma  
akea irouna te  
TANGIRA ni koaua;  
bon akea uaan  
maiuna".*



kakarimoa te *TANGIRA* i marenara n taai nako riki n tangiria ara kairiribai nako ao ni keiaki ni kakeai ni kabane muin marenara aika bubuaka ngkoa. N taai nako ao ti riai n ongongotaeka nakon banan nanora ae koaua man tangira ao n aki karina aia taeka tabeman ae e na manga kona n anganiira riki te nanououa, Ma ngkai ti a tia n ongo ana taeka Atuaa ae kingin maeura bon bainan te *TANGIRA* ao ti a riai n onika maiura ma ngkai, ao n Onimakina Te Uea ma te nano ni koaua.



### Boukaia Kain te Burikatorio

*E rereke am tai n tataro ibukia tarim ma mane ake a tiku ni kamaraki n te burikatorio?*

Ana bubuti Emanuera nakoira ba ti na kabatia riki ara tataro n ibuobuoki nakoia tarira ma manera aika tiku n te Burikatorio n tataninga kabarakia.

Ti a bane n reita nanora ma Atiniban Nei Maria ae Imakurata n ana tataro are e anganira ni kaotina i Fatima are kangai;

**"Iesu ti a butiko,  
kabarai ara bure,**

**tukira man te ai ni mone,  
kairia aomata ni kabaneia  
nako karawa**

**ao buokia akana a kanano-  
anga riki".**

Buoka tinara Nei Maria ni karokoa ana kamaiu Atiniban Iesu ae Moan te Tabu nakoia aomata ni kabane ao riki tqrirq mq mqrerq aika a rangi ni kananoanga n kamarakaki n te burikatorio.

(E reke te rongorongo aio ianon te mii ni karangainan te Kanimabong 19, Tun

## Te Kawai Nakon te Maiu ae Tabu

### Te Ririki ibukia Berebitero (2009-2010)

E a tia Tamara Te Bobe Benetito XVI ni kotea kakawakin te Nakoa ae Tabu ao e a tia naba ni baireia ba te bong ae te Kanimabong, 19<sup>th</sup> June, 2009, are bongin ana Toa Atiniban Iesu ae Moan te Tabu, e na kaukaki iai te Ririki ibukia Berebitero.

Antai St Viane? Te bubua nimabui (150) te ririki n nako, e a mate iai te Tama Viane are e katabuaki ba te Santo iroun Bobe Pio X (1903-1039). Rongorongon te Tama aio, ba e aki bati ni wanawana n te reirei n te kuura n tama ao e kuri n reke aio ba tukana nakon katabuana ibukin te nakoa ni Berebitero. E kateretereaki ikai ba te Atua E aki kainnanao te wanawana ibukin kabutaan Ueana. Tao aei naba bukin rineakina iroun Tamara te Bobe ba e na riki ngaia ba te Santo ibukia berebitero ao te banna ni katooto ae moan baan te raoiroi ibukia ao n riki ba Taama aika a kinaaki ba a tabu maiua.

Buroon Iesu bon ngaia buroon aia makuri berebitero. E aitaria ma ana rinerine Tamara te Bobe ibukin ana tai ni katanoata te Ririki ibukia ara Berebitero ba te bong are bon ana Toa Atiniban Iesu ae Moan te Tabu.

Kakawakin aia makuri Berebitero ba bon taan reitira ma Ara Uea ae Iesu Kristo n aroia n onea muina iaon te aba ao n riki ba ngaia taan bobotia ana aomata te Atua inanon te Ekaretia.

E bia riki te Ririki ibukia Berebitero aio ba te ririki ibukia ngaiia ara berebitero ao bon ngaira riki ni kabane ba te tai are ti na nora ao ni kina aron kakawakin nakoia Berebitero ba te nakoa ae kakannato ao te nakoa naba ae moan te tabu.



### Prayer for Priests

*O, Jesus, eternal Priest,  
keep your priests within the shelter  
of Your Sacred Heart,  
where none may touch them.*

*Keep unstained their anointed hands,  
which daily touch Your Sacred Body.*

*Keep unsullied their lips,  
daily purpled with Your Precious Blood.*

*Keep pure and unearthly their hearts,  
sealed with the sublime mark of the priesthood.*

*Let Your holy love surround them and  
shield them from the world's contagion.*

*Bless their labors with abundant fruit and  
may the souls to whom they minister  
be their joy and consolation,  
here and in heaven their beautiful  
and everlasting crown. Amen.*

~ St. Therese of Lisieux

